

Prof. dr. Zijad Šehić rođen je 23.10. 1959. u Mrkonjić Gradu gdje je završio osnovnu školu i gimnaziju. Na Filozofskom fakultetu u Sarajevu studirao je historiju i tu je kao marljiv i uspješan student diplomirao 1982. godine. Pokazavši u toku prethodnog studija smisao za naučni rad i poznavanje njemačkog i francuskog jezika on se 1985. godine upisao na postdiplomski studij na Odsjeku za historiju Filozofskog fakulteta u Sarajevu. Nakon što je položio predviđene ispite, te poslije dužeg boravka u SR Njemačkoj i rada u tamošnjim arhivima i bibliotekama, Zijad Šehić je 26. 03. 1991. na Filozofskom fakultetu u Sarajevu odbranio magistarsku tezu *Aneksiona kriza 1908-1909. u svjetlu evropske istoriografije*". Tu je Šehić demonstrirao poznavanje široke literature i uspješno sumirao najvažnije rezultate evropske historiografije o naznačenim pitanjima.

Zijad Šehić je akademsku 1994/95. godinu proveo na studijskom boravku na Univerzitetu u Beču kao dobitnik Herderove stipendije Fondacije FVS iz Hamburga. Stipendija mu je dodijeljena na prijedlog prof. dr Dževada Juzbašića, dobitnika Herderove nagrade za 1994. godinu. Uz selektivno pohađanje predavanja na Univerzitetu, težište Šehićevog rada u Beču bilo je na studiju literature i arhivskim istraživanjima u cilju izrade doktorske disertacije. Njegovu pažnju privukla je tematika vojne historije, a posebno historijat bh. jedinica i bh. zemaljskih pripadnika u austrougarskoj vojsci. U toku studijskog boravka u Beču Šehićev mentor bio je univ. prof. dr Horst Haselsteiner, rukovodilac Instituta za istraživanje istočne Evrope. Po povratku u Sarajevo izabran je u zvanje višeg asistenta na Filozofskom fakultetu na predmetu *Opća historija novog vijeka sa savremenom historijom*. Uz uspješno izvršavanje svojih obaveza u procesu nastave, Šehić je nastavio sa istraživačkim radom.

Doktorsku disertaciju *Bosanskohercegovački zemaljski pripadnici u vojnoj organizaciji Habsburške Monarhije 1878-1918*. (519 strana) Zijad Šehić je odbranio na Filozofskom fakultetu u Sarajevu 19. 04. 2002.g. pred Komisijom koju su sačinjavali akademik Dževad Juzbašić, redovni profesor na Filozofskom fakultetu u Sarajevu, Dr Iljas Hadžibegović, redovni profesor na Filozofskom fakultetu u Sarajevu, Dr Ibrahim Karabegović, redovni profesor na Filozofskom fakultetu u Sarajevu i akademik Arnold Suppan, redovni profesor na Univerzitetu u Beču. Nakon toga dr. Zijad Šehić je izabran u zvanje docenta na oblast *Opća historija novog vijeka sa savremenom historijom*. U decembru 2007. je biran u zvanje vanrednog, a u novembru 2013. redovnog profesora. .

- Uže područje istraživanja prof. dr. Zijada Šehića je historija Bosne i Hercegovine u kontekstu evropske historije, posebno u periodu austrougarske uprave 1878.-1918. godine, kao i njeno

mjesto u međunarodnoj diplomatiji XIX i XX stoljeća. Do da je objavio oko 70 naučnih i stručnih radova i priloga, četiri autorske i tri koautorske knjige i bio je koautor pet udžbenika i dva priručnika za preduniverzitetsko obrazovanje. (Pored ostalog vidi: Zijad Šehić – Ibrahim Tepić, *Povijesni atlas Bosne i Hercegovine. Bosna i Hercegovina na geografskim i historijskim kartama*, IP Sejtarija, Sarajevo 2002., 353 str; Zijad Šehić, *U smrt za cara i domovinu. Bosanci i Hercegovci u vojnoj organizaciji Habsburške monarhije 1878-1918*, IP Sarajevo Publishing, Sarajevo 2007, 329 str; Zijad Šehić – Ibrahim Tepić, *Historical Atlas of Bosnia and Herzegovina* (IP Sejtarija, Sarajevo 2007, 124 str.; Zijad Šehić – Ibrahim Tepić, *Historisches Atlas Bosnien und Herzegowina*, IP Sejtarija, Sarajevo 2007., 124 str.; Zijad Šehić, Friz Hans, *Bosnjak-Bosniak*. Dobra knjiga, Sarajevo, 2007. (Prevod knjige sa stručnim komentarom); Zijad Šehić, *U mojoj Bosni. Povodom stogodišnjice posjete cara Franje Josipa i Bosni i Hercegovini od 30. maja do 4. juna 1910.*, Sarajevo : Dobra knjiga, 2013; Zijad Šehić, *Eksperiment u svjetskoj laboratoriji Bosna. Međunarodna diplomatija u periodu disolucije SFRJ i agresije na Republiku Bosnu i Hercegovinu (do Vašingtonskog sporazuma 18. marta 1994.,)* Dobra knjiga, Sarajevo, 2013;

Prof. dr. Zijad Šehić je učestvovao na 30 naučnih skupova (od toga na deset međunarodnih) i u radu na nekoliko naučnih projekata. Kao ekspert nastupio je u novembru 2004. godine pred Haškim međunarodnim sudom za zločine u bivšoj Jugoslaviji. U statusu gostujućeg predavača držao je predavanja na Univerzitetu Karl Maximilian u Grazu (*Bosnien und Herzegowina 1878-1918. Zwischen Tradition und Modernisierung*) i na Institutu za istočnoevropske studije (Institut osteuropäische Studien, Campus Universität Wien, *Bosnischen Identitet*). Od 2007. godine član je Evropske komisije za historiju Jugoistočne Evrope.

Obavljao je dužnost predsjednika nastavno-naučnog vijeća Odsjeka za historiju Filozofskog fakulteta u Sarajevu, dužnosti prodekana za nastavu i studentska pitanja, i kraće vrijeme vršio dužnost koordinatora za međunarodnu saradnju Filozofskog fakulteta. Govori francuski i njemački jezik.

Nakon uvođenja bolonjske koncepcije studija izvodio je nastavu na više predmeta iz evropske, svjetske i bosanskohercegovačke historije. Na prvom ciklusu studija držao je nastavu na predmetima *Evropska i svjetska historija ranog novog vijeka 1500-1789*, *Evropska i svjetska historija novog vijeka 1789-1918*, *Evropska i svjetska savremena historija 1918-2000*, te na izbornom predmetu *Putopis kao historijsko svjedočanstvo. Sarajevo u njemačkoj putopisnoj literaturi 1531-1995*. Na II ciklusu studija na naučnom smjeru izvodio je nastavu na predmetima *Svjetska historija do 1918*, i *Evropska i svjetska savremena historija* i izbornim predmetima *Bosna i Hercegovina u vojnoj organizaciji Habsburške monarhije 1878-1918*. i *Bosna i*

Hercegovina u međunarodnim odnosima u XX stoljeću. Na nastavnom smjeru II ciklusa studija izvodi nastavu na predmetima *Ličnosti evropske i svjetske historije 1500-1918* i *Tri svjetske političke scene 1918-1945*. Na postdiplomskom studiju po ranijem sistemu držao je nastavu na predmetima *Evropska i svjetska historija XIX i XX stoljeće* i *Historiografija Bosne i Hercegovine* i izbornom predmetu *Kartografija Bosne i Hercegovine*. Nakon pokretanja doktorskog studija drži predavanja na predmetima *Evropski kontekst historije Bosne i Hercegovine u XIX i XX stoljeću* i *Metdologija (stanje izvora i rad na uzvorima)*.

Do sada je bio mentor dvadeset i sedam kandidata (osam na ranijem postdiplomskom studiju, dvanaest na II ciklusu studija i sedam na ranijem doktorskog studiju).

Nakon izbora u zvanje redovnog profesora za oblast *Svjetska i bosanskohercegovačka historija - novi vijek i savremeno doba* drži nastavu na predmetima *Evropska i svjetska historija novog vijeka (1789-1918)*, *Savremena svjetska historija*, *Izborni predmet Putopis kao historijsko svjedočanstvo – Sarajevo u njemačkoj putopisnoj literaturi (1531- 1991)*, *Izborni predmet Bosna i Hercegovina u vojnoj organizaciji Habsburške monarhije 1878 - 1918*, *Izborni predmet Bosna i Hercegovina u međunarodnim odnosima u 20. stoljeću*, *Evropska i svjetska savremena historija (1918 – 2000)*, *Politička ideologija u 20. stoljeću*.